

龍文鞭影
卷之四

八 庚

蕭收圖籍，孔惜繁纓。卞莊刺虎，李白騎鯨。
王戎支骨，李密陳情。相如完璧，廉頗負荆。
從龍介子，飛雁蘇卿。忠臣洪皓，義士田橫。
李平鱗甲，苟變幹城。景文飲鳩，茅焦伏烹。
許丞耳重，丁掾目盲。傭書德潤，賣卜君平。
馬當王勃，牛諸袁宏。譚天鄒衍，稽古桓榮。
岐曾販餅，平得分羹。臥床逸少，升座延明。
王勃心織，賈逵舌耕。懸河郭子，緩頰酈生。
書成鳳尾，畫點龍睛。功臣圖閣，學士登瀛。
盧攜貌醜，衛玠神清。非熊再世，圓澤三生。
安期東渡，潘嶽西征。志和耽釣，宗儀輟耕。
衛鞅行詐，羊祜推誠。林宗傾粥，文季爭羹。
茂貞苛稅，陽城緩徵。北山學士，南郭先生。
文人鵬舉，名士道衡。灌園陳定，爲圃蘇卿。
融賦滄海，祖詠彭城。溫公萬卷，沈約四聲。
許詢勝具，謝客遊情。不齊宰單，子推相荆。
仲淹複姓，潘閔藏名。烹茶秀實，漉酒淵明。
善釀白墮，縱飲公榮。儀狄造酒，德裕調羹。
印屏王氏，前席賈生。

九 青

經傳御史，偈贈提刑。士安正字，次仲談經。
咸遵祖臘，寬識天星。景煥垂戒，班固勒銘。
能詩杜甫，嗜酒劉伶。張綽剪蝶，車胤囊螢。
鸚鵡學語，鸚鵡誦經。

十 蒸

公遠玩月，法喜觀燈。燕投張說，鳳集徐陵。
獻之書練，夏竦題綾。安石執拗，味道模稜。
韓仇良複，漢紀備存。存魯端木，救趙信陵。
邵雍識亂，陵母知興。

十一 尤

琴高赤鯉，李耳青牛。明皇羯鼓，煬帝龍舟。
羲叔正夏，宋玉悲秋。才壓元白，氣吞曹劉。
信擒夢澤，翻徙交州。曹參輔漢，周勃安劉。
太初日月，季野春秋。公超成市，長孺爲樓。
楚邱始壯，田豫乞休。向長損益，韓愈鬥牛。
璫除釀部，玄拜隱侯。公孫東閣，龐統南州。
袁耽擲帽，仁傑攜裘。子將月旦，安國陽秋。

德輿西掖，庚亮南樓。梁吟傀儡，莊夢髑髏。
孟稱清發，殷號風流。見譏子敬，犯忌楊修。
荀息累卵，王基載舟。沙鷗可狎，蕉鹿難求。
黃聯池上，楊詠樓頭。曹兵迅速，李使遲留。
孔明流馬，田單火牛。五侯奇膳，九婢珍饈。
光安耕釣，方慕巢由。適嵇命駕，訪戴操舟。
篆推史籀，隸善鍾繇。邵瓜五色，李橘千頭。
芳留玉帶，琳卜金甌。孫陽識馬，丙吉問牛。
蓋忘蘇隙，聶報嚴仇。公藝百忍，孫昉四休。
錢塘驛邸，燕子樓頭。

十二 侵

蘇耽橘井，董奉杏林。漢宣續令，夏禹惜陰。
蒙恬造筆，太昊制琴。敬微謝饋，明善辭金。
睢陽嚼齒，金藏披心。固言柳汁，玄德桑陰。
姜桂敦復，松柏世林。杜預傳癖，劉峻書淫。
鍾會竊劍，不疑盜金。桓伊弄笛，子昂碎琴。
琴張禮意，蘇軾文心。公權隱諫，蘊古詳箴。
廣平作賦，何遜行吟。荆山泣玉，夢穴唾金。
孟嘉落帽，宋玉披襟。沫經三敗，獲被七擒。
易牙調味，鍾子聆音。令狐冰語，司馬琴心。
滅明毀壁，龐蘊投金。左思三賦，程頤四箴。

十三 覃

陶母截發，姜后脫簪。達摩面壁，彌勒同龕。
龍逢極諫，王衍清談。青威漠北，彬下江南。
遐福郭令，上壽童參。郗愔啓篋，殷羨投函。
禹偁敏贍，魯直沉酣。師徒佈算，姑婦手談。

十四 鹽

風儀李揆，骨相呂嵒。魏牟尺縱，裴度千縑。
孺子磨鏡，麟士織簾。華歆逃難，叔子避嫌。
盜知李涉，虜懼仲淹。尾生豈信，仲子非廉。
由餐藜藿，鬲販魚鹽。五湖范蠡，三徑陶潛。
徐邈通介，崔郾寬嚴。易操守劍，歸罪遺縑。

十五 咸

深情子野，神識阮咸。公孫白紵，司馬青衫。
狄梁被譖，楊億蒙讒。布重一諾，金慎三緘。
彥升非少，仲舉不凡。古人萬億，不盡茲函。